

Kulturip umiarsuaaraanik pilersitsisoqarsinnaanera pillugu apeqquteqaat aallaavigalugu oqallisissiaq pillugu siunnersuut.
(Inatsisartunut ilaasortaq Peter Olsen, Inuit Ataqatigiit)

Akissuteqaat

(Meeqyanut, Inuuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Naalakkersuisut sinnerlugit Inatsisartunut ilaasortaq Peter Olsen, Inuit Ataqatigiit, kulturip umiarsuaaraanik pilersitsisoqarsinnaanera pillugu apeqquteqaat aallaavigalugu oqallinnissamut siunnersuuteqarneranut qujassuteqarfigaara.

Isiginaagassiat assiginngitsut assigisaallu aqqutigalugit kulturilerisutta, kulturip umiarsuaaraanik pilersitsinikkut, qanoq iliorlutik innuttaasunut amerlanerpaanut tikissinnaanerannut tunngatillugu siunnersuuteqartoq apeqqummik soqtiginaatilimmik saqqummiussivoq.

Soorlu siunnersuuteqartup tunngavilersuutimini allakkaa, Nunatta Isiginaartitsisarfia ukioq kingulleq umiarsuaaraq atorlugu Kalaallit Nunaanni sumiiffinni 14-ini innuttaasunut nuannaarutaasumik, isiginaagassianik marlunnik isiginaartitsilluni angalaarpoq.

Naalakkersuisut aamma ilisimaaraat, siorna aggustimi Arktisk Kommando nipilersonermut tunngasunik pissanganartunik nunatta avannaani nunaqarfinnut illoqarfinnullu angallassivoq, matumani siunertaalluni najukkani inuiaqatigiit aamma Arktisk Kommando-p akornanni attaveqaqatigiilernissaq, kulturi nipilersonerlu ikorsiullugit kiisalu umiarsuaq pillugu taannalu Kalaallit Nunaata imartaani qanoq atorneqartarnersoq paasissutissiilluni.

Naalakkersuisut suliniutit taama ittut pitsaasutut isigaat neriuutigaallu allanit taakku aamma isumassarsiorfigalugit iluaqutigineqarsinnaassasut, taamaasilluni sapinngisamik innuttaasunut amerlanerpaanut isiginaagassiat, suliniutit il.il. apuunneqarsinnaaniassammata.

Taama oqaaseqareerlunga, kulturip umiarsuaaraanik pilersitsisoqassagaluarpat allaffissornikkut aningaasaqarnikkullu kingunissaritinneqartut iserfiginissaat avaqqunneqarsinnaanngilaq. Tamatuma saniatigut umiarsuaqqamik tassannga piginnittuunissaq, aningaasalersuinissaq kingornatigullu ingerlatsinissaq aserfallatsaaliinissarlu pillugit inissiinissaq pisariaqartussaavoq.

Taamatut oqaaseqarlunga inersuarmi oqallittoqarluarnissaanut Naalakkersuisut qilanaarput.